



Damondas da baghegiar

Nr. 05/2023

Datum da publicaziun: 20-01-2023

Patrun: Jud-Caplazi Daniela, 8718 Schänis

Liug e parcella: Surrein-Via Plazzas; 5072

Object: tschentar barcuns novs

Ils profils ein tschentai ed ils plans da construcziun ein deponi tier la canzlia communal. L'investa publica cuozza 20 dis dapi il datum da publicaziun.

Eventualas protestas encunter sura damonda da baghegiar ein d'inoltrar alla cumissiun da baghegiar Sumvitg enteifer 20 dis dapi il datum da publicaziun.

Dils plans sa vegnir priu investa sin canzlia communal durant las uras da spurtegl.

Sumvitg, 20-01-2023

Cumissiun da baghegiar

Ordinaziun da traffic, comunicaziun ufficala

1. La suprastanza communal da Sumvitg ha l'intenziun d'introducir la suandonta restricziun da traffic sin il territori communal:

Scamond general da traffic en omisduas direcziuns (sig. 2.01)

- Liug / fracziun, via: Rabius, Via Tscheps, naven dalla parcella nr. 343

durant ils meins d'univern cura che la via sto vegnir serrada muort motivs da segirtad (cura che la via ei cuvretga cun niev)

2. Questa mesira duei evitar traffic nunnecessari sin la via communal.
3. La restricziun da traffic planisada ei vegnida approvada ordavon ils 12 da schaner 2023 dalla polizia cantunala sin basa d'igl art. 7 al. 2 LitLTV.
4. Objecziuns e posiziuns en connex cun l'ordinaziun da traffic planisada san vegnir inoltradas enteifer 30 dis suenter la publicaziun alla suprastanza communal dalla vischnaunca Sumvitg. Suenter l'examinaziun dallas posiziuns inoltradas decida la vischnaunca e publichescha il conclus el Fegl uffical cantunal, ensemen cun ina indicaziun dils mieds legals, per recuorer tier la dertgira administrativa.

Sumvitg, 20-01-2023

Suprastanza communal

Presentaziun dalla concorrenza d'architectura e formaziun dalla cuntrada Lag Salischinas

Igl atun 2022 ha la vischnaunca menau atras ina concorrenza d'architectura e formaziun dalla cuntrada per il project Lag Salischinas. A caschun da quella concorrenza ha la giuria d'experts tscharniu il project dil biro d'architectura Capaul e Blumenthal, Glion sco victur dalla concorrenza.

Mesjamna, ils 8 da fevrer 2023 allas 19.00 uras vegn informau davart il project sco era davart la concorrenza en casa da scola Surrein.

Program

1. avertura
2. beinvegni dil president communal
3. beivegni dalla cumissiun Lag Salischinas
4. informaziun davart la concorrenza
5. presentaziun dil project victur
6. explicaziuns davart il proxim agir

La suprastonza communal envida cordialmein all'orientaziun e spera sin stedia participaziun.

Sumvitg, 20-01-2023

Suprastonza communal

Informaziun pertuccont grippa d'utschals

Ils davos dus onns eis ei vegniu constatau ell'Europa plirs cass dalla grippa d'utschals. Era il gaglinom da casa ei periclitau dil virus. Ord quei motiv ha igl uffeci federal da segirezia alimentara e fatgs veterinars en concordanza culs cantuns decidiu da relaschar per l'entira Svirza in perimeter da controlla entochen ils 15 da fevrer 2023. Per impedir la derasaziun dalla grippa d'utschals eis ei impurtont d'impedir il contact digl gaglinom da casa cun utschals. Possessuras e possessurs da gaglinom ston perquei risguardar il suandont:

- Il plaz da semover ordado per gaglinom da casa ei da restrenscher sin plaz serrai, ni da procurar ch'il plaz da pavlar ordado ei buc accessibels per utschals selvadis.
- Gaglinas ein da tener dapersei dad aucas ed utschals.
- Possessuras e possessurs d'animals che san buca tener en quellas prescripziuns, ston tener il gaglinom en in nuegl serrau.

Ulteriuras informaziuns ein disponiblas sin la pagina d'internet www.sumvitg.ch.

Nus supplichein da risguardar quels scamonds ed engraziein per Vies sustegn per dar damogn alla grippa d'utschals.

Sumvitg, 20-01-2023

Suprastonza communal

Viseta en Casa federala

Ils 14 da settember 2023 organisescha la vischnaunca in viadi a Berna per far ina viseta al president dil Cussegl naziunal Martin Candinas en Casa federala.

Tuttas convischinas e tuts convischins che han interess da visitar nies Cussegl naziunal Martin Candinas en Casa federala ein cordialmein envidai da s'annunziar per il viadi tier l'administraziun communal per e-mail (info@sumvitg.ch) ni per telefon sut la numera 081 920 25 00 entochen ils 28 da fevrer 2023. Ils cuosts dil viadi cun il tren surpren la vischnaunca.

Nus sperein sin stedia participaziun. Per damondas stat l'administraziun communal bugen a Vossa disposiziun.

Sumvitg, 20-01-2023

Suprastonza communal

Alarm d'emprova dallas sirenas

Mesjamna, **ils 1 da fevrer 2023** han ils alarms d'emprova liug. Igl alarm general vegn fatgs allas 13.30 ed allas 13.45 uras ed igl alarm d'aua allas 14.15 ed allas 15.00 uras. Nus supplichein Vus da prender enconuschiantscha da quella informaziun.

Sumvitg, 20-01-2023

Suprastonza communal

Serrada via Val Sumvitg

Ord motivs da segirtad resta la via Val Sumvitg serrada naven d'immediat sil tschancun da Val anen per tut traffic.

Sumvitg, 20-01-2023

Departament traffic